

Ел жүрегі – елорда шежіресі

АСТАНА АҚШШАМЫ

РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

Ғылымсыз қоғам алға жылжымайды

Астанадағы С.Сейфуллин атындағы Қазақ агротехникалық университетінде Елбасы Нұрсұлтан Назарбаевтың халқымызға арналған "Қазақстанның үшінші жаңғыруы: жаһандық бәсекеге қабілеттілік" атты Жолдауы талқыланды. Жиынға жоғары оқу орнының ғалымдары мен студенттері қатысты.

- Елбасының халыққа Жолдауы қашан да ерекше маңызы бар оқиға саналып, алдағы таңда мемлекеттің дамуы мен экономикалық-әлеуметтік саласының бағытын айқындап береді, - деп бастады сөзін университет ректоры. - Биылғы жолдаудың ерекшелігі - Мемлекет басшысы экономиканың технологиялық дамудың жаңа моделін ұсынып отыр. Бұл дегеніміз - ғылым мен инновация және адам капиталының сапасы көтеріледі деген сөз. Біздің ғалымдардың армандап жүрген ойлары Жолдауда жазылғандықтан, оған өте қуаныштымыз. Ғылымсыз қоғам алға жылжымайды. Жолдауда ғылыми-зерттеу институттарын құру, оқулық бағдарламаларын өзгерту, ағылшын тілін дамыту туралы нақты тапсырма берілген. Ал оны жүзеге асыру - бәріміздің де алдымызда тұрған міндет, - деді ол.

Содан кейін Ақылбек Күрішбаев «Қазіргі таңда Елбасының Жолдауын іске асырудың жоспары даярланып жатыр. Біз оған үн қосуымыз қажет. Күні кеше Білім және ғылым министрлігіне, сондай-ақ, Ауыл шаруашылығы министрлігіне хат дайындадық. Онда Қазақ агротехникалық университетінің базасында ғылыми-зерттеу университетін құру мен техникалық базаны күшейту және оқытушылардың жалақысын көтеру жайында жаздық. Әрине, оның бәрі ел бюджетіне байланысты болғанымен, біз мемлекеттік гранттардың көлемін ұлттық университеттердің деңгейіне дейін көтеруді ұсынып отырмыз» деп өзекті ойдың түйінін тарқатты.

Сондай-ақ, оның айтуынша ақпан айында С.Сейфуллин атындағы Қазақ агротехникалық университеті мен Қарағанды облысының әкімдігі арасында меморандумға қол қойылып; кенді өлке аймағына оқу ордасының қашықтықтан басқару технологияларынан бастап мал мен жер шаруашылығы саласындағы ғылыми жаңалықтарды таныстырып, ірі ауыл шаруашылығы кәсіпорындарында студенттерді іс-тәжірибеден өткізуді жоспарлап отыр екен.

Сонымен бірге, жиында экономика факультетінің деканы Әлия Сабыржанқызы мен энергетикалық факультеттің 1-курс студенті Мариям Жалғасбаева жарыссөзге шығып; Елбасының Қазақстан халқына арнаған Жолдауы жайында жылы пікірлерін білдірді.